

Na osnovu člana 82. stav 1. Zakona o veterinarstvu u Bosni i Hercegovini ("Službeni glasnik BiH", broj 34/02), federalni ministar poljoprivrede, vodoprivrede i šumarstva donosi

UPUTSTVO

O NAČINU PRIJAVLJIVANJA ZARAZNIH BOLESTI ŽIVOTINJA

1. Ovim Uputstvom se utvrđuje način prijavljivanja zaraznih bolesti životinja od strane vlasnika životinja, veterinarskih organizacija, nadležnog kantonalnog veterinarskog inspektora (u daljnjem tekstu: veterinarski inspektor), Federalnog ministarstva poljoprivrede, vodoprivrede i šumarstva (u daljnjem tekstu: Federalno ministarstvo) i veterinarskih ustanova (ovlaštenih i referentnih laboratorija) u slučajevima postavljanja i potvrđivanja sumnje na zaraznu bolest.

2. Ako se pojavi zarazna bolest, ili se pojave znaci na osnovu kojih se sumnja da je životinja bolesna ili je uginula od zarazne bolesti, vlasnik ili držatelj životinje je obavezan o tome obavijestiti najbližu veterinarsku organizaciju ili veterinarskog inspektora te spriječiti pristup drugih lica i životinja do zaražene životinje, krda, jata, pčelinjaka, odnosno trupa uginule životinje.

3. Veterinarska organizacija koja je postavila sumnju na pojavu zarazne bolesti sa liste "A" Aneksa 1. Odluke o zaraznim bolestima ("Službeni glasnik BiH", broj 44/03) obavezna je o tome telefonom, faxom ili elektronskom poštom na obrascu iz Aneksa 5. navedene Odluke, najkasnije u roku 24 sata obavijestiti veterinarskog inspektora te do njegovog dolaska provoditi sve mjere za sprečavanje širenja zarazne bolesti, propisane Zakonom o veterinarstvu u Bosni i Hercegovini.

Veterinarski inspektor pojavu sumnje iz stava 1. ove tačke hitno, a najkasnije u roku 24 sata, prijavljuje Federalnoj upravi za inspeksijske poslove (u daljnjem tekstu: Federalna uprava) i Federalno ministarstvo koje u istom roku obavještava Ured za veterinarstvo Bosne i Hercegovine.

O rezultatima dijagnostičkog ispitivanja uzoraka u vezi sa sumnjom na pojavu bolesti iz stava 1. ove tačke, referentna laboratorija hitno telefonom, faxom ili elektronskom poštom obavještava Federalno ministarstvo, Federalnu upravu, Ured za veterinarstvo BiH i Veterinarsku organizaciju koja je dostavila uzorak.

4. Ako se pojavi sumnja na bolest iz liste "B" Aneksa 1. Odluke o zaraznim bolestima, veterinarska organizacija je dužna o tome obavijestiti veterinarskog inspektora i poslati uzorke u referentnu laboratoriju.

O rezultatima laboratorijske pretrage referentna laboratorija obavještava veterinarsku organizaciju koja je dostavila uzorak na analizu i veterinarskog inspektora.

5. Ako je sumnja na zarazno obolenje potvrđena, veterinarska organizacija prijavljuje zarazu veterinarskom inspektoru na obrascu za hitnu prijavu (Aneks 6. Odluke o zaraznim bolestima).

Veterinarski inspektor o pojavi zarazne bolesti obavještava resorno kantonalno ministarstvo, Federalno ministarstvo i Federalnu upravu.

O sumnji ili potvrdi zoonoze veterinarski inspektor je dužan obavijestiti nadležnu zdravstvenu službu.

6. Ako se pojavi primarno žarište zarazne bolesti iz tačke 4. stav 1. ovog Uputstva referentna laboratorija o rezultatima pretrage obavještava Federalno ministarstvo i Ured za veterinarstvo BiH.

7. Jednom mjesečno, najkasnije do 15. u mjesecu, dijagnostički laboratorij je dužan poslati cjelovit izvještaj o rezultatima svih provedenih dijagnostičkih pretraga u prethodnom mjesecu Federalnom ministarstvu, a Federalno ministarstvo obavještava Ured za veterinarstvo o pojavi bolesti putem biltena o zaraznim i parazitarim bolestima.

8. Ovo Uputstvo stupa na snagu narednog dana od dana objave u "Službenim novinama Federacije BiH."

Broj 06-1-02-889-1/09
19. oktobra 2009. godine
Sarajevo Ministar
Mr. sci. **Damir Ljubić**, s. r.